

四庫全書

集部

欽定四庫全書

集部
宋文紀卷十四

詳校官庶吉士臣瑚圖禮

主事銜臣徐以坤覆勘

總校官進士臣楊懋珩

校對官中書臣李斯咏

謄錄監生臣劉清澗

欽定四庫全書

宋文紀卷十四

明梅鼎祚編

蕭思話

南蘭陵人孝懿皇后弟子歷鎮西將軍郢州刺史

奉世祖牋

元凶弑立以思話爲徐兗二州刺史思話即率部曲還彭城起義以應世祖遣使奉牋

下官近在歷下始奉國諱所祿使人不知閹狹既還在路漸有所聞猶謂人倫無容有此私懷感慨未敢在言奉被令教果出慮表重增哀惋不能自勝此實天地所

不覆載人神所不容忍率土民氓莫不憤咽況下官蒙
荷榮渥義兼常志此月五日被驛使追命騎還朝切齒
拊心輒已鍾疾雖百口在都一非所顧正欲遣啟受規
略會奉令旨悲懼兼情伏承司徒英圖電發殿下神武
霜斷臧質忠義並到不謀同時仗順沿流席卷江甸前
驅風邁已應在近下官復練始集遣輔國將軍申坦龍
驤將軍梁坦二軍分配精甲五千申坦爲統便以即日
水陸齊下下官悉率文武駱驛繼發憑威策懦勢同振

朽開泰有期悲欣交集

蕭惠開

南蘭陵人思誥子歷益寧二州刺史少府南郡太守未拜卒

上解職表

惠開孝建元年自太子中庶子轉黃門侍郎與侍中何偃爭事偃親遇甚

隆使門下推彈之惠開上表解職由是忤旨別敕以屬疾多免官

陛下未照臣愚故引參近侍臣以職事非長故委能何
偃凡諸當不敢參議竊見積射將軍徐沖之爲偃命所
黜臣愚懷謂有可申故聊設微異偃恃恩使貴欲使人
靡二情便訶脅王者手定文案割落臣議專載已辭雖

天照廣臨竟未見察臣理違顏咫尺致茲壅濫則臣之
受劾蓋何足悲但不順待中臣有其咎當而行之不知
何過且議之不允未有彈科省心揆天了知在宥臣不
能謝愆右職改意重臣刺骨鑠金將在朝夕乞解所忝
保拙松庭

柳元景

字孝仁河東解人歷侍中尚書令南豫州
刺史爲前廢帝所殺南史作字叔仁誤

元景弟

叔仁

與朝士書

元景除寧朔將軍京兆廣平二郡太守於樊城立府舍世祖入討元凶以爲諮議參軍領中兵加冠軍將軍配萬人爲前鋒宗慤薛安都等十三軍皆隸焉元景與朝士書

國禍寃深凶人肆逆民神崩憤若無天地南中郎親率義師以討元惡司徒臧冠軍並同大舉舳艫千里購賞之利備之元景不武忝任行間總勒精勇先鋒道路勢乘上流衆兼百倍諸賢齊世忠義身爲國良皆受遇先朝荷榮日久而拘逼寇廷莫由申効想聞今問悲慶兼常大行屆道廓清惟始企遲面對展雪哀情

宋書世祖時爲南

中郎將江州刺史
臧冠軍質

宣告討臧質檄書

質奉南郡王義宣舉兵東下世祖遣撫軍將軍柳元景統

王玄謨等屯梁山元景檄書宣告

夫革道應運基命之洪符嗣業興邦紹厯之明算自非
瑞積神衷德充民極孰能升臨寶位景屬天居大宋啟
期理高中世皇根帝業永流無疆夷陂遽來邁茲凶難
國禍寃深人綱鬱滅主上聖略聰武孝感通神義變草
木哀動精緯躬近南郊親掃大逆道援橫流德模靈造

三光重照七廟載興臧質少負疵釁衣冠不齒昧利誣
天著於觸事受任述職不以宣効爲心專方莅民惟以
侵剝爲務官自賄至族以貨傾是以康周院覆命屠宗
寃達蒼昊郭伯西門遺出自皂隸寵越州朝往莅東土
鬻爵三千率卒西討竊俘取黜荷恩彭泗貪虐以逞坑
戮邊氓忽若草芥傾竭倉庾割沒軍糧作牧漢南公盜
府蓄矯易文簿專行欺妄及受命北伐憚役緩期師出
有辰顧懷私愛匹馬棄衆宵行獨返遂復攜嬪擁姬淫

宴軍幕孔范之變顯於逆辭凡此諸釁皆彰著於憲簡
振曝於觀聽去歲義舉雖豫誠款而淹留西楚私相崇
戴奉書致命形於心迹新亭之捷大難已夷凶命假存
懸在晷刻廣莫之軍曾無遺矢重關自開僞衆已潰質
猶復盤桓衢巷後騎陳師勞不足甄定於朝議虛張功
伐扇動怨辭自謂斯舉勲莫已若初踐殿守忘犬馬之
情奔趣帑藏頓傾天府山海弘量包荒藏疾錄其一介
之心掩其不逞之釁遂爵首元等職班盛級優榮溢寵

莫與爲疇自恣醜薄固知涯涘干謁陳聞曾無紀極請
樂窮太子之英求器盡官府之選徐司空匪躬王室遭
罹凶禍質與之少長親交兼常曾無撫孤之仁惟聞陵
侮之酷尺田寸寶靡有孑遺及受命南徂臨路滋甚逼
奪妻嬪略市金帛怨動京邑醜聞都鄙棄逐舊故委蔑
忠勤魯尚期尹周之徒心腹所倚注訴於御筵袁同連
子敬之儔爪牙所杖一逝而不反雖上旨頻煩屢求勞
牒質但稱伐在已不逮僚隸託咎朝廷歸罪有司國士

解心有識莫附何文敬趨走厮養天性愚狡質迷其姦
諂真懷委仗遂外擅威刑內遊房室質生與釁俱不可
詳究擢髮數罪曾何足言丞相威重位尊任居分陝宗
國倚賴實兼恒情而不及謙冲之塗弗見逆順之訓蔽
同卻至理乖范燮遂乃遠忽世祀近受欺邁仗納姦疏
還謀社稷日者宴安上流坐觀成敗示遺疲卒衆裁三
千戎馬不供軍糧靡獻皇朝直以親秩之重酬寵兼極
近漸別子禮越常均苟識無所守功弗由已必爲義不

全終于敗德今茲放命恨心于本推諸昔歲迹是誠非
矣且國家夷險情事異常豫是臣子孰不星赴而玩寇
忘哀曾無奔拽面蕃十稔惠政蔑聞重賦深掠縱慾已
甚姬妾百房尼僧千計敗道傷俗悖亂人神民怨盈塗
國謗彌歲又賊劬未禽凶歲猶彊將毀其私墳戮其諸
子圖成駭機垂賴義舉捷期云速不日告平釋怨毒之
心解倒懸之急論恩叙德造育爲重援人自助棄人快
讒怙亂疑功未聞其比僕以不肖過蒙榮私荷佩升越

光絕倫伍家本北邊志存慷慨常甘投生以徇艱棘惟
恩思難激氣衝襟故以眺三湘而永慨望九江而遐憤
若使身死國康誓在隕命况仰稟聖略俯鞠義徒萬全
之形愚夫所照夫薛竟陵控率宸騎陸道步馳檀右衛
申右率垣游擊整勒銳師飛輪構路王豫州方舟繕甲
久已前驅僕訓卒利兵凌波電進沈鎮軍蕭安南接舳
連旌首尾風合驃騎竟陵王懿親令譽聞望攸歸大司
馬江夏王道略明遠徽猷茂世並旄鉞臨塗雲驅齊引

羣兵競邁秘駕徐啟八鑾搖響五車舒飾十束雷動萬
軸雲回騰威發號星流漢轉以上臨下易於轉員加以
三謀協從七緯告慶幽顯同心昭然易覩諸軍或世荷
恩幸或身聞教義當知君臣大節誓不可犯冠屨至誨
難用倒置履安奉順聲泰事全孰與附逆居危身害名
醜慈親垂白受戮弱子嬰孩就誅所以有詔遲回未震
雷霆者正爲諸君身拘冠手或懷乃心吉凶由人無謂
爲遠今而不變後悔何及受檄之日心馳賊庭

謝莊

字希逸陳郡陽夏人
歷中書令散騎常侍

與世祖啟事

元凶弑立莊轉司徒左長史世祖入討密送
檄書與莊令加改治宣布莊遣腹心門生具

慶奉啟事

密詣世祖

賊劬自絕於天裂冠毀冕窮弑極逆開闢未聞四海泣
血幽明同憤奉三月二十七日檄聖迹昭然伏讀感慶
天祚王室獻哲重光殿下文明在嶽神武居陝肅將乾
威龔行天罰滌社稷之仇雪華夷之耻使弛墜之構更

獲締造垢辱之耻復得明目伏承所命柳元景司馬文
恭宗慤沈慶之等精甲十萬已次近道殿下親董銳旅
授律繼進荆郢之師岷漢之衆舳艫萬里旌旆虧天九
土冥符羣后畢會今獨夫醜類曾不盈旅自相暴殄省
闈橫流百僚屏氣道路以目檄至輒布之京邑朝野同
欣里頌塗歌室家相慶莫不望景聳魂瞻雲佇足先帝
以日月之光照臨區寓風澤所漸無幽不洽況下官世
荷寵靈叨恩踰量謝病私門幸免虎口雖志在投報其

路無由今大軍近次永清無遠欣悲踊躍不知所裁

與大司馬江夏王義恭牋

莊拜吏部尚書素多疾不願居選
部與義恭牋後坐辭疾多免官

下官凡人非有達鑒異識俗外之志實因羸疾常恐奄
忽故少來無意于人間豈當有心於崇達耶頃年乘事
回薄遂果饗非次既足貽誚明時又亦取愧朝友前以
聖道初開未遑引退及此諸夏事寧方陳微請款志未
伸仍荷今授被恩之始具披寸心非惟在已知尤實懼

塵穢彞序稟生多病天下所悉兩脅痺疾殆與生俱一
月發動不減兩三每至一惡痛來逼心氣餘如綻利患
數年遂成痼疾吸吸懅懅常如行尸恒居死病而不復
道者豈是病痊直以荷恩深重思答殊施牽課尅瘵以
綜所忝眼患五月來便不復得夜坐恒閉帷避風日晝
夜惛懵爲此不復得朝謁諸王慶弔親舊唯被救見不
容停耳此段不堪見賓已數十日持此苦生而使銓綜
九流應對無方之訴實由聖慈罔已然當之信自苦劇

若才堪事任而體氣休健承寵異之遇處自效之塗豈
苟欲思閒辭事耶家素貧弊宅舍未立兒息不免麤糲
而安之若命寧復是能忘微祿正以復有切于此處故
無復他願耳今之所希唯在小閑下官微命於天下至
輕在已不能不重屢經披請未蒙哀恕良由誠淺辭訥
不足上感家世無年亡高祖四十曾祖三十二亡祖四
十七下官新歲便三十五加以疾患如此當復幾時見
聖世就其中煎懷若此實在可矜前時曾啟願三吳救

旨云都不須復議外出莫非過恩然亦是下官生運不
應見一閑逸今不敢復言此當付之來生耳但得保餘
年無復物務少得養病此便是志願永畢在衡門下有
所懷動止必聞亦無假居職患於不能裨補萬一耳識
淺才常羸疾如此孤負主上擢授之恩私心實自哀愧
入年便當更申前請以死自固但庸近所訴恐未能仰
徹公恩盼弘深粗照誠懇願侍坐言次賜垂拯助則苦
誠至心庶獲哀允若不蒙降祐下官當於何希冀耶仰

憑窓察願不垂恠

宋書

瘳疾南史作瘳疾恒閉帷避風日作恒閉帷避風朝謁作朝修今

之所希惟在小間作今之所止惟在小間掙作接

爲朝士與袁顗書

藝文類聚云謝莊

夫夷陂相因興革遞數或多難而固其國或殷憂而啟
聖明此既著於前史亦彰於聞見王室不造昏凶肆虐
神鼎將淪宗稷幾泯幸天未亡宋乾歷有歸主上體自
聖文繼明作睿而辱均牖里屯踰夏臺既天地俱憤義
勇同奮赴殄鯨鯢三靈更造應天順民爰集寶命四海

屬息肩之歡華戎見來蘇之泰吾等獲免刀鋸僅全首
領復身奉惟新命承亨運緩帶談笑擊壤聖世汝雖劬
勞于外跡阻京師然心期所寄江漢何遠自九江告變
皆謂鄧氏狂惑比日國言籍籍頗塵吾子道路之議豈
其或然聞此之日能無駭惋凶人反道敗德日夜滋深
昵近狡慝取謀豺虎非惟毒流外物惡積中朝乃欲毀
陵邑虐崇憲燒宗廟鹵御物然後蕩覆京都必使蘭蕕
俱盡自非聖主廟算靈圖俛眉遜避維持內外擁衛臣

下則赤縣爲戎百姓其魚矣此事此理寧可熟念既天道輔順謳歌有奉高祖之孫文皇之子德洞九幽功貫三曜匡拯家國提毓黔首若不子民南面將使神器何歸而羣下構慝妄生窺覲成軫惑燕貫高亂趙讒人罔極自古有之汝中京冠冕儒雅世襲多見前載縣鑒忠邪何遠遺郎中之清軌近忘太尉之純槩相與或羣從舅甥或姻婭周款一旦胡越能無悵恨若疑誑所至邪說無窮汝當誓衆奮戈翦此朝食若自延過聽迷塗未

遠聖上臨物以仁接下以愛豈直雍齒先封乃當射鉤
見相矣當由力窘跡屈丹誠未亮耶跂予南服寤寐延
首若反棹沿流歸誠鳳闕錫珪開寓非爾而誰吾等並
過荷曲慈俱叨非服紵金拖玉改觀蓬門入奉舜禹之
渥出見羲唐之化雍容揄揚信白駒空谷之時也柰何
毀擲先基自蹈凶戾山門蕭瑟松庭誰掃言念楚路豈
不思父母之邦幸納惡石以蠲美疢裁書表意爾其圖
之

顓太尉淑兄子時尚書右僕射蔡興宗是顓舅領
軍將軍袁粲是顓從父弟故書云羣從舅甥也

魏通互市議

世祖初莊
爲侍中議

臣愚以爲獯獫棄義唯利是視關市之請或以覘國順
之示弱無明柔遠拒而觀釁有足表彊且漢文和親豈
止彭陽之寇武帝修約不廢馬邑之謀故有餘則經略
不足則閉關何爲屈冠帶之邦通引弓之俗樹無益之
軌招塵點之風交易爽議既應深杜和約詭論尤宜固
絕臣庸管多蔽豈識國儀恩誘降逮敢不披盡

論行節儉表

世祖始踐阼欲宣弘風則下節
儉詔書莊慮此制不行言之

詔云貴戚競利興貨塵肆者悉皆禁制此實允厯民聽
其中若有犯違則應依制裁糾若廢法申恩便爲令有
所屈此處分伏願深思無緣明詔既下而聲實乖爽臣
愚謂大臣在祿位者尤不宜與民爭利不審可得在此
詔不拔葵去織實宜深弘

上廣搜才路表

孝建初遷左衛將軍上表有詔
莊表如此可付外詳議事不行

臣聞功照千里非特燭車之珍德柔鄰國豈徒祕璧之
貴故詩稱殄悴誓述榮懷用能道臻無積化至恭已伏

惟陛下膺慶集圖締寓開殿夕爽選政晏旦調風采言
所興觀謠仄遠斯實辰階告平頌聲方製臣竊惟隆被
所漸治亂之由何嘗不興資得才替因失士故楚書以
善人爲寶虞典以則哲爲難進選之軌既弛中代登造
之律未闡當今必欲崇本康務庇民濟俗匪更慈憫奚
取九成夫才生于時古今豈貳士出于世屯泰焉殊升
厯中陽英賢起於徐沛受錄白水茂異出於荆宛寧二
都智之所產七隩才之所集實遇與不遇用與不用耳

今大道光亨萬務俟德而九服之曠九流之艱提鈞懸
衡委之選部一人之鑒易限而天下之才難原以易限
之鑒鏡難原之才使國罔遺授野無滯器其可得乎昔
公叔與僕同升管仲取臣於盜趙文非親士踈嗣祁奚
豈諂讎比子茹茅以彙作範前經舉爾所知式昭往牒
且自古任薦賞罰弘明成子舉三哲而身致魏輔應侯
任二士而已捐秦相白李稱冀缺而疇以田采張敖進
陳湯而坐以褫爵此先事之盛准亦後王之彛鑒如臣

愚見宜晉命大臣各舉所知以付尚書依分銓用若任得其才據主延賞有不稱職宜及其坐重者免黜輕者左遷被舉之身加以禁錮年數多少隨愆議制若犯大辟則任者刑論又政平訟理莫先親民親民之要實歸守宰故黃霸治潁川累稔杜畿居河東歷載或就加恩秩或入崇輝寵今莅民之職自非公私必應代換者宜遵六年之制進獲章明庸惰退得民不勤擾如此則下無浮謬之愆上靡棄能之累考績之風載泰植薪之歌

克昌臣生屬亨路身漸鴻猷遂得奉詔左右陳愚於側

敢露芻言懼氛恒典

功照千里南史作功傾魏后燭車作照車鄰國作秦客治亂作成敗

弛作鹽闢作聞崇作豐才之所集作愚之所有授作賢昔公叔登臣管仲升盜親士作私親褫作弛制作限擾

勞作

慶皇太子元服上至尊

伏惟皇太子殿下明兩承乾元良作貳杭法于身英華
自遠樂以修中禮以制外三善克懋德成教尊今日昭
辰顯加元服對靈祇之望儔上庠之歡率天罄世莫不

載躍

又皇太子元服上皇太子表

離景承宸樞光陪極毓問東華飛英上序樂正歌風司
成頌德清明神鏡溫文在躬練日簡辰顯備元服懋三
王之教燭少陽之重

東海王讓司空表

臣側觀前載與窺洪典三事之授惟帝其難臣乘少籍
長久分踰涯量出滿入泰每究榮光不悟乾燭方遠義

路同遺下參弘化上尸變理自非德仞具瞻聲堪民詠
未有妄臻此澤空集茲靈

讓吏部尚書表

招才琴釣之上取士歌牧之中終能克夷景命榮懷萬
宇豈容先私首曲近有經過且不習冠制趙客興鑒未
聞統馭鄭臣有規匪晦身譏

讓中書令表

伏惟殿下登馭震維臨齊璿政澤與風翔恩從雲動臣

聞壁門天邃鳳沼神深絲綸王言出納帝命自非望允
當時譽宣庠塾未有謬垂曲寵空席茲榮在於平壯猶
不可勉況於綿痼百志俱淪

謝賜貂裘表

臣莊言主衣黃達言敕賜臣貂裘匭發衽開玄華有臞
靡毫柔毳黯鑑自疑固以綵越綴翬光逾緝鷺臣聞頻
笑不安韓裳勿假續有昭庸楚纘爰建臣歡忭自歌而
同委衾之澤勤勞未報而叨解裘之寵空荷榮施徒賁

微軀承殊恩必識服以淪生銘悅之情罔知所寘臣受假無由躬拜謹遣表

改定刑獄奏

莊以辭疾多坐免官大明元年起為都官尚書奏

臣聞明慎用刑獄存姬典哀矜折獄實暉呂命罪疑從輕既前王之格範寧失弗經亦列聖之恒訓用能化致升平道臻恭已逮漢文傷不辜之罰除相坐之令孝宣倍深文之吏立鞠訊之法當是時也號令刑存陛下踐位親臨聽訟億兆相賀以為無冤民矣而此囹圄未虛

頌聲尚缺臣竊謂五聽之慈弗宣於宰物三宥之澤未洽於民謠項年軍旅餘弊刼掠猶繁監司計獲多非其實或規免咎不慮國患楚對之下鮮不誣濫身遭鉅鑕之誅家嬰孥戮之痛比五同閔莫不及罪是則一人罰謬坐者數十昔齊女告天臨淄臺殞孝婦冤錄東海懲陽此皆符變靈祇初咸景緯臣近兼訊見重囚八人旋觀其初死有餘罪詳察其理實並無辜恐此等不少誠可怵惕也舊官長竟囚畢郡遣督郵案驗仍就施行督

郵賤吏非能異於官長有案驗之名而無研究之實愚
謂此制宜革自今入重之囚縣考正畢以事言郡并送
囚身委二千石親臨覈辨必收聲吞釁然後就戮若二
千石不能決乃度廷尉神州統外移之刺史刺史有疑
亦歸臺獄必令死者不怨生者不恨庶鬻棺之諺輟歎
於終古兩造之察流詠於方今臣學闇申韓才寡治術
輕陳愚管懼乖國憲

為尚書八座封皇子郡王奏

臣聞桐珪睦親書河汾之策賜帶懷賢敬東平之祚諒
以訓經終始義洽垣墉第某皇弟等器彩明敏令識穎
悟並宜憲章前典光啟祚宇作屏王室式雍帝載臣等
參議可封郡王

為尚書八座改封郡長公主奏

臣聞爵厚懿戚國之恒典景祚既新禮與時渥永興等
七公主可封郡長公主

北中郎新安王拜司徒章

不惟震施罔匱鴻澤方稠燮調之重遂臻非據智小謀大周易興規少陽微暄有鑒前史辨其動植布其安擾以倡九牧阜成王教豈臣眇末所能克荷

又爲其中郎將謝兼司徒章

臣聞燮理陰陽寅亮天地弗惟其官無人則闕司徒掌敷五典職擾兆民豈悟乾靈罔匱光渥方闡不次之任殊絕藩岳豈可權尸三事假備六符慙震周廻顧步交悸

孝武帝哀策文

應門洞望馳道南除叢塗已撤鬱壘將虛哀子嗣皇帝
擗標池緯周遑旌軫攀七緯之崩淪慟三靈之徂盡百
神慕而行雲沉萬國哀而素霜實衣冠緬邈弓劍不追
敢緝謳頌髣髴希夷其辭曰

樞電皇根月瑤國緒肩裔丹陵蟬聯華渚二后在天大
行纂武克睿克聖重規襲矩昭昭金式明明玉溫望雲
其遠就日其尊雨零露湛夏暖冬暄聲芳納麓道昭賓

門上德無稱至功不器怙悵四始優游六位綴響蘭深
緝言瓊秘悠哉梁踐眇焉汾肆敬業開寓離經作翰鴻
起荆河鷹遊楚漢泗濱霑明江區承魚陝左清郊棠陰
虛館地維不紐乾綱弛機義庭薄蝕紫路流飛泣血派
涖顧瞻川沂孝貫樞極義震寰圍誓鉞皇郊詔師牧甸
七景締華五雲卷煽雪怨園邑掃恥瀛縣啟聖宸居集
寶龍見王室多故國步方蹇淮濟烈冠江荆毀冤東楚
亂常西華啟釁動算揮圖爰戡剪浹宙斯澄綿區咸

鏡修風曉起德星夕映潄露飛甘舒雲結慶禎被動植
信泊翔泳缺禮克宣墜章必構方堂饗極圓流肆冑南
聳郊宮北清靈圓瑤軒春藉翠華冬狩經緯窮文克定
盡武部上呈祥介丘載佇在盈念冗成功弗處榮鏡中
世弈舄前古睿業初遠鴻化方亭丹雲承日素景騰星
玉几去襲綴衣在庭辭重陽之昭昭降大夜之冥冥氣
貿炎涼史詔龜筮文物空嚴鑾和虛衛動蜃輅之逶迤顧
璧羽之容裔出國門而分天地向幽途而異身世龍旌蔚

而青槐遠驚葭亂而白楊翳觀初霜之變條聽秋風之
下蒂橋山絙雲縠林虧日輦道結寒松庭盡密芝蓋迫
軫上驤春轡萬寓肅其北輶靈阿聞其深隘南維有時
傾離光不常鏡騰英聲與茂實方流華於舞詠

皇太子妃哀策文

楹凝桂酒庭肅龍輶風吹國路雲起郊門皇帝傷總緣
之掩綵悼副禕之滅華行光既宴長河又斜顧而言曰
璇璫有毀郁烈無湮剪素裁簡授之史臣其辭曰

霍岫虧天灑流凝漢祥發桐珪慶昭金算毓景帝出飛
芳戚閑秘儀施谷升音集灌月晷幾望娣袂維良釋幃
春宮承筐少陽五葉衍藻四訓抽光歲蕤蕙振婉孌瓊
相清徽就遠祲沴方搏臨華寵翠當暉收蘭複殿生響
長廡結寒節移虛饋氣變容衣中庭草暖階上螢飛傷
縈里第痛溢朝闈霜侵燭昧風密帷淒驚葭夕轉龍驂
夜嘶筵既訣兮奠既撤背青闕兮去神閨旌掩鬱而還
泛蓋逶迤而顧低素紉歛維華輶解馭山隧恒陰松阿

不曙離天渥兮就消沉委白日兮即冥暮菊有秀兮衡
有芬德方遠兮聲彌樹

孝武殷貴妃謚冊文

維年月日皇帝曰洛故淑儀殷氏惟爾含徽挺茂爰光
素里友琴流荇實華紫掖奉軒景以柔明登譽處椒風
以婉孌升名幽閑之範日藹層闈繁祉之慶方崇蕃世
而當春掩藻中波滅源朕用震悼傷于厥心松區已剪
泉冥將墜宜有旌德第行式衍聲芳今遣某官集冊告

謚曰宣魂而有靈尚茲寵渥嗚呼哀哉

孝武宣貴妃誄

并序 莊爲誄贊軌引漢昭母趙婕妤堯母門事廢帝在東宮

銜之及登位詰責莊曰卿昔作殷貴妃誄頗知有東宮不將殺之繫於尚方太宗定亂乃

得出

惟大明六年夏四月壬子宣貴妃薨律谷罷煖龍鄉輟
曉照車去魏聯城辭趙皇帝痛掖殿之既閒悼泉塗之
已宮巡步檐而臨蕙路集重陽而望椒風嗚呼哀哉天
寵方隆王姬下姻肅雍揆景陟屺爰臻國軫喪淑之傷

家凝實庇之怨敢撰德於旂旒庶圖芳於鐘鼎其辭曰
玄丘煙煨瑤臺降芬高唐淩雨巫山鬱雲誕發蘭儀光
啟玉度望月方娥瞻星比婺毓德素里棲景宸軒處麗
締綌出懋蘋繁修詩賁道稱圖照言翼訓如幄贊軌堯
門綢繆史館容與經闡陳風緝藻臨豕分微游藝殫數
撫律窮機躊躇冬愛悵悵秋暉展如之華實邦之媛敬
懃顯陽肅恭崇憲奉榮維約承慈以遜逮下延和臨朝
違怨祚靈集祉慶藹迎祥皇睂璿式帝女金相聯附齊

穎接萼均芳以藩以牧燭代輝梁視朔書氣觀臺告稷
八頌局和六祈輟滲衡總滅容翬翟毀衽掩綵瑤光收
華紫禁嗚呼哀哉帷軒夕改輶輅晨遷離宮天邃別殿
雲懸靈衣虛襲組帳空烟巾見餘軸匣有遺絃嗚呼哀
哉移氣朔兮變羅紉白露凝兮歲將闌庭樹驚兮中帷
響金釭暖兮玉座寒純孝擗其俱毀共氣摧其同藥仰
昊天之恩報怨凱風之徒攀茫昧與善寂寥餘慶喪過
于哀棘實滅性世覆冲華國虛淵令嗚呼哀哉題湊既

肅竈筮既辰階撤兩奠庭引雙輶維慕維愛曰子曰身
慟皇情于容物崩列辟于上旻崇徽章而出寰甸照殊
策而去城闐嗚呼哀哉經建春而右轉循閭闔而徑度
旌委鬱于飛飛龍逶遲于步步鏘楚挽于槐風過邊簫
于松霧涉姑射而環迴望樂池而顧慕嗚呼哀哉晨輶
解鳳曉蓋俄金山庭寢日隧路抽陰重扃閉兮燈已黯
中泉寂兮此夜深銷神躬于壤未散靈魄于天尋響乘
氣兮蘭馭風德有遠兮聲無窮嗚呼哀哉

黃門侍郎劉琨之誄

秋風散兮涼葉稀出吳州兮謝江畿瞻國門兮聳雲路
睇舊里兮驚客衣魂終朝而三奪心一夜而九飛過建
春兮背闕庭歷承明兮去城輦旌徘徊而北係轡逶迤
而不轉挽掩隧而辛嘶驥含愁而鳴俛顧物色之共傷
見車徒之相泣

豫章公主墓誌銘

稟中樞之照體星軒之華肅恭在國掖庭欽其風格

勤衡館庶族仰其德神葉靈條爰自帝堯文信啟魯肇
京于楚宵燭載照娥英是從婉婉締綌優柔肅雍衡蕙
有寶金碧不居泉庭一夜里館長蕪

司空何尚之墓誌

遠源長瀾自晉徂韓潛川韜玉霍岫騰驚處華民瞻出
光帝難寂寞壽仁茫昧報施調於飭歸經難褰寄晝映
留芳煙煨作義

竹贊

瞻彼中唐綠竹猗猗貞而不介弱而不虧杳裊人圃蕭瑟雲崖推名楚潭美質梁池

殷琰

陳郡長平人歷少府加給事中

宣貴妃誅

太平御覽

嚴位服於旗容尚徽謚於銘策節哀路於蕭鐘齊行鑣於輶翟

臧質

字含文東莞莒人燾之弟歷車騎將軍江州刺史從義宣反敗誅

答魏主書

元嘉中魏太武南侵太祖以質爲輔國將軍北救至盱眙太武築長圍攻

之與質書時魏地童謡曰軺車北來如穿雉
不意魏馬飲江水魏主北歸石濟死魏欲渡
江天不從質
答書引之

省示具悉姦懷爾自恃四脚屢犯國疆諸如此事不可
具說王玄謨退於東梁坦散於西爾謂何以不聞童謡
言耶魏馬飲江水佛狸死卯年此期未至以二軍開飲
江之徑爾冥期使然非復人事寡人受命相滅期之白
登師行未遠爾自送死豈容復令生全饗有桑乾哉但
爾往攻此城假令寡人不能殺爾爾由我而死爾若有

幸得爲亂兵所殺爾若不幸則生相鎖縛載以一驢直
送都市我本不圖全若天地無靈力屈於爾壅之粉之
屠之裂之如此未足謝本朝爾識智及衆力豈能勝苻
堅耶頃年展爾陸梁者是爾未飲江太歲未卯年故爾
斛蘭昔深入彭城值少日雨隻馬不返爾豈憶耶即時
春雨已降四方大衆始就雲集爾但安意攻城莫走糧
食闕乏者告之當出廩相飴得所送劒刀欲令我揮之
爾身耶甚苦人附反各自努力無煩多云

並宋書
國
彊通鑑作邊

境梁坦作申坦爾謂何以不聞童謡言耶作爾獨不聞童謡之言乎徑作路莫走作勿處走告之作可見語

又與魏人書

宋購斬燾封開國縣侯食邑一萬戶賜布絹各萬匹質寫臺格與魏軍書太武攻城三旬死過半乃引還

示詔北方諸士庶狸伐見與書如別爾等正朔之民何爲力自取如此大丈夫豈可不知轉禍爲福耶今寫臺

格如別書自思之

宋書 資治通鑑爾語敵中諸士庶佛狸所與書相待如此爾正朔之民

何爲自取廉滅豈可不知轉禍爲福耶

舉兵上孝武帝表

世祖即位拜質爲江州刺史質素有威名自謂人才爲一

世英傑遂有異圖以南郡王義宣凡關易可制勒欲外相推奉以成其志因說誘舉兵內

向先上表

詳義宣下

臣聞執藥隨親非情謬於甘苦揮斤斬毒豈忘痛於肌膚蓋以先疑後順忠焉必往忍小存大雖愛必從丞相臣義宣育愆台鉉拊聲聯服定主勤王之業勲越乎齊晉宗戚懿親之寄望崇于魯衛而惡直醜正寔繁有黨或染凶作僞疾害元功或藉勞挾寵乘威縱戾自知愆

深釁重必貽剿戮乃成紫毀朱交間忠輔崇樹私徒招聚羣惡念舊愛老無一而存豈不由凶醜相扇志肆讒惑陛下垂慈狎達不稍惟疑遂令負宸席圖蔽於流議投杼市虎成於十夫鑒古揆今實懷危逼故投袂樊葉立節于本朝揮戈晉陽務清于君側臣誠庸懦奉教前朝雖惡緇衣好賢之美敢希巷伯惡惡之情固已藉風聽而宵憤撫短策而馳念况乃宏命爰格誠係宗社今奉旨前邁星言啟行臣本凡瑣少無遠槩因緣際會遂

班槐鼎素望既盈愜心實足豈應徵功非冀更希異寵
直以蔓草難除去惡宜速是以無顧夷險慮不及身仰
恃天眷察亮丹心苟血誠不照甘心罪戮伏願陛下先
鑒元輔匪躬茂節未錄庸瑣奉國微誠不遂渙忍之情
以失四海之望昭戮馬劒顯肆市朝則結旌向國全鋒
凱歸九流凝序三光平耀斯則仰說宗廟俯愜兆民裁
表感慨涕言無已

魯爽

小字女生扶風郿人歷汝
陽太守從義宣起兵見殺

奉南平王鑠

鑠字休立文帝第四子歷侍中驃騎將軍錄尚書事爲元凶劬所任

世祖立
毒殺之

爽祖魯宗之以義熙元年起義爲輔國將軍
雍州刺史屢建大功與司馬休之北奔父軌
爲魏寧南將軍荊州刺史圖欲歸順未果爽
少有武藝魏主燾常置左右元嘉末軌死爽
襲爲父官其弟秀才力過爽爲魏中書郎燾
南行遣爽向壽陽仍至瓜步始與秀定歸南
之謀長社成魏有六七百人爽遣三百騎往
界上參聽夜擊敵衆盡殺之馳入虎牢遂率
部曲及願從合千餘家奔汝南秀從許昌還
壽陽奉辭於鑠鑠馳驛以聞上大悅以爽爲
征虜將軍司州刺史秀輔國
將軍管陽潁川二郡大守

爽秀得罪本朝負釁三世生長絕域遠身敵國兄弟闔
門淪黜僞授殞命不可還國無因近係南雲傾屬東日
蓋猶痿人思步盲者願明嵩霍咫尺江河匪遠夷庚壅
塞隔同天地痛心疾首晝慨宵悲魏主猖狂豺豕其志
虐徧華戎怨結幽顯自盱眙旋軍亡殪過半昏酣沉湎
恣性肆身爽秀等因民之憤籍將旋之願齊契義奮臬
馘醜徒馮恃皇威肅清逋穢牢落諸城指期尅定規以
涓塵微雪夙負方當東骸北闕待戮司寇懦節未申伏

心邊表明大王殿下以叡茂居蕃文武兼安遠邇欽傾
承風聞德願垂援拯以慰虔望老弱百口先遣歸底逼
逼丹心仰希懷遠謹遣同義潁川聶元初奉詞陳聞

宋書

文帝詔

僞寧南將軍魯爽中書郎魯秀志幹削到忠誠久著撫
茲福先闔門效款招集義銳梟剪裒醜肅定邊城獻馘
象魏雖宣孟之去翟歸晉積當之出胡入漢方之此日
曾何足云朕實嘉之宜即授任逞其忠略爽可督司州

陳留東郡濟陰濮陽五郡諸軍事征虜將軍司州刺史
秀可輔國將軍管陽潁川二郡太守其諸子弟及同契
士庶委征虜府以時申言詳加酬叙

版文

魯爽爲司州刺史孝建元年二月臧質奉
義宣反約秋當同舉爽狂酒即日起兵義

宣進爽號征北將軍爽送所造輿服詣江陵
叛義宣及質等並起征北府戶曹版文義宣
駭愕所送並留竟陵不聽
進兵敗爲薛安都所殺

丞相劉補天子名義宣車騎臧今補丞相名質平曲朱
令補車騎名脩之皆版到奉行

張暢

字少微吳郡吳人歷會稽太守

與從弟張永書

永字景雲茂世子歷征北將軍南兗州刺史

永初爲冀州刺史經畧河南攻碣磔城大破於魏爲撫軍將軍蕭思話所收繫歷城獄元凶弒立起永督諸軍事輔國將軍青州刺史南譙王義宣起義又板永爲冀州刺史永遣司馬崔勲之中兵參軍劉則二軍馳赴國難時思話在彭城義宣慮二人不相諧緝與思話書勸與永坦懷又使永從兄長史暢與永書云

近有都信具汝刑網之源可謂雖在縲紲而復心無愧矣蕭公平厚先無嫌隙見汝翰迹言不相傷何其滔滔

稱人意耶當今世故艱迫義氣雲起方藉羣賢共康時
難當遠慕廉蔭在公之德近效平勃忘私之美忽此蕪
芥尅申舊情公亦命蕭示以踈達兼令相執共遵此旨
宋書

楊亦牘載張暢答魏虜李孝伯求甘云知更須黃甘
若給彼軍即不能足若供魏主未當乏絕故不復致
按張暢傳暢爲安北長史沛郡太守與魏
孝伯往返口語殊衆悉非書也王亦注辨

河清頌

渾渾洪河家國之濱襟帶晉衛領袖齊秦龍門誕溜積

石傳津乘運能育經啟天文化流上帝時表初星飛書
曝瑞龍圖照神協靈既偉通氣載榮

張永

字景雲暢弟歷侍
中南兗州刺史

將士休假議

永孝建初爲尚書左丞時將士休
假年開三番紛紜道路永建議從

之

臣聞開兵從稼前王以之兼隙耕戰遞勞先代以之經
遠當今化寧萬里文同九服捐金走驥於焉自始伏見
將士休假多蒙三番程會既促裝赴在早故一歲之間

四馳遙路或失遽春耜或違要秋登致使公替常儲家
闕舊粟考定利害宜加詳改愚謂交代之限以一年爲
制使正士之念勞未及積遊農之望收功歲成斯則王
度無騫民業斯植矣

張悅

孝武時爲
湘州刺史

璚瑁塵尾銘

移珍西岳賁藻南濱姚古流制鑠道飛文凝華揆景搖
綵爭雲夷心似鏡色象斯分

王謨

舉用楊頭等表

武都王楊文德以伐啖頭羌不尅爲梁州刺史劉秀之執送荆

州使文德從兄頭戌茹蘆世祖孝建二年以前武都王楊玄長孫元和爲征虜將軍以頭爲輔國將軍元和繼楊氏正統頭母妻子弟並爲魏人所執頭至誠奉順朝廷既不正元和號位部落未有定主雍州刺史王謨表請不許

被敕令臣遣使與楊元和楊頭相聞并致信餉即遣中軍行參軍呂智宗齎書并信等亦自遣使隨智宗及頭語智宗頃破家爲國母妻子弟并墜沒敵中不顧孝道

陳力邊捍竭忠盡誠未爲朝廷所識若以元和承統宜授王爵若以其年小未堪大任則應別有所委頃來公私紛紜華戎交構皆此之由臣伏尋頭元嘉以來實有忠誠於國棄親遺愛誠在可嘉氏羗負遠又與魏咫尺急之則反緩之則怨觀頭使人言語不敢便望仇池公所希政在西秦州假節而已如臣愚見蕃捍漢川使無邊患頭實有力四千戶荒州殆不足吝元和小弱若未可專委復數年之後必堪嗣業用之不難若才用不堪

則應歸頭若茹蘆不守漢川亦無立理

蔡興宗

字興宗廓之子歷尚書僕射荊州刺史

申令孫繫廷尉議

興宗大明時爲廷尉卿有解士先者告申坦昔與義宣同

謀時坦已死子令孫作山陽郡自繫廷尉興宗議

若坦昔爲戎首身今尚存累經肆眚猶應蒙宥令孫天
屬理相爲隱況人亡事遠追相誣訐斷以禮律義不合
關若士先審知逆謀當時即應聞啟包藏積年發因私
怨况稱風聲路傳實無定主而干黷欺罔罪合極法

餉郭原平朱百年妻米教

並辭不受

秩年之貺著自國書餽貧之典有聞甲令况高柴窮老
萊婦屯暮者哉永興郭原平世稟孝德洞業儲靈深仁
絕操追風曠古棲貞處約華考方嚴山陰朱百年道終
物表妻孔羣齒孀居窶迫殘日欽風撫事嗟慨滿懷可
以帳下米各餉百斛

劉瑀

字茂琳穆之孫歷東陽吳興太守

彈蕭惠開

非才非望非勲非德

彈王僧達

瑤遷御史中丞使氣尚人爲憲司甚得志彈王僧達朝士莫不畏其筆端

蔭藉高華人品冗末

與顏峻書

瑤爲御史中丞轉右衛將軍瑤願爲侍中不得因求益州世祖許之及行

甚不得意至江陵與峻書

朱脩之三世叛兵一旦居荊州青油幕下作謝宣明面

見向使齊師以長刀引吾下席於吾何有政恐匈奴輕

漢耳

宋書 一旦南史作一日 魏書云朱脩之爲宋文帝從事中郎守消臺爲魏將安頡所擒魏世祖

授以內職爲雲中鎮將入馮文通文通送之江南赤牘作牢脩之又列晉人誤

與親故書

瑀免官復起爲東陽太守遷吳興太守侍中何偃常案之云參伍時望瑀大怒曰我於時望何參伍之有遂與偃絕及爲吏部尚書意彌憤憤族叔秀之爲丹陽尹瑀又與親故書其年疽發背何偃亦發背癰瑀疾篤聞偃亡懼躍叫呼於是亦卒

吾家黑面阿秀遂居留安衆處朝廷不爲多士

宋書留南史

劉作

劉秀之

字道寶穆之從兄子世居京口歷雍州刺史

民殺長吏議

大明四年改定制令謂民殺長吏值赦宜加徙送秀之爲尚書右僕

射議從之

律文雖不顯民殺官長之旨若值赦但止徙送便與悠悠殺人曾無一異民敬官長比之父母行害之身雖遇赦謂宜長付尚方窮其天命家口令補兵

路瓊之

建康人崇憲太后弟子歷衡陽內史

乞贈父道慶表

大明四年瓊之爲撫軍參軍上表於是贈給事中瓊之兄弟並

超顯職

先臣故懷安令道慶賦命乖辰自違明世敢緣衛戍請
名之典特乞雲雨微垂灑潤

孔淵之

會稽山陰人丹陽尹靈符第二子歷尚書比部郎坐父賜死

張江陵及妻罵母議

時安陸縣民張江陵與妻吳共罵母黃令死黃忿恨

自經死值赦律父子賊殺傷毆父母泉首罵詈棄市謀殺夫之父母亦棄市值赦免刑補治江陵母以罵自裁重於傷毆及罵若同殺科則又疑重制唯有打母遇赦猶泉首無罵母致死值赦之科淵之議從之吳免棄市

夫題里逆心而仁者不入名且惡之況乃人事事故歐傷

呪咀法所不原詈之致盡則理無可宥罰有從輕蓋疑失善求之文旨非此之謂江陵雖值赦恩故合梟首婦本以義愛非天屬黃之所恨情不在吳原死補治有允正法

顧琛

字弘瑋吳郡吳人歷員外常侍中散大夫

啓孝武帝

大明初琛爲吳郡太守免官傳家先嘗與西陽太守張牧並竟陵王誕故佐誕據廣陵反遣客陸延稔齎書詣琛等及其二子並有板授時世祖以琛或有異志遣使就吳郡太守

王曇生誅琛父子會延稔先至琛即執斬之遣二子送首啟世祖世祖嘉之召以爲西陽

王撫軍

司馬

劉誕猖狂遂構釁逆凡在含齒莫不駭惋臣等預荷國恩特百常憤忽以今月二十四日中獲賊誕疏欲見邀誘臣即共執錄僞使并得誕與撫軍長史沈懷文揚州別駕孔道存撫軍中兵參軍孔琛前司兵參軍孔桓之前司空主簿張晏書具列本郡太守王曇生臣即日便應星馳歸骨輦轂臣母年老身在侍養輒遣息寶素寶

先束骸詣闕

宋書

顧寶先

大明中歷尚書水部郎

報父吳郡太守琛書

太宗初即位上流反叛輔國將軍袁粲自會稽起兵遣書要琛琛與長子寶素謀議其少子寶先時爲山陰令馳書報琛琛顛前鋒已渡江琛據郡同反兵敗琛歸降

南師已近朝廷孤弱不時順從必有覆滅之禍

宋書

劉思

南史通典並作劉颺

唐賜妻子議

賜往北村飲還得盡病臨死語妻張劄腹出病張及賜子副從之郡

縣以張妻傷夫五歲刑子不孝棄市並非科
例三公郎劉思及顧覲之並議詔如覲之

賜妻痛遵往言兒識謝及理考事原心非存忍害謂宜

哀矜

顧覲之

字偉仁吳人
歷湘州刺史

唐賜妻子議

法移路尸猶爲不道況在妻子而忍行凡人所不行不
宜曲通小情當以大理爲斷謂副爲不孝張同不道

顧愿

字子恭吳郡吳人好學有文辭大明中
舉秀才對策擢著作佐郎太子舍人

定命論

愿伯父覲之嘗謂秉命有定分非智力所移唯應恭已守道信天任運而闇者

不達妄求僥倖徒虧雅道無關得喪乃以其意命愿者定命論

仲尼云道之將行命也道之將廢命也丘明又稱天之所支不可壞天之所壞不可支卜商亦曰死生有命富貴在天孟軻則以不遇魯侯爲辭斯則命運奇偶生數離合有自來矣馬遷劉向揚雄班固之徒著書立言咸以爲首世之論者多有不同嘗試申之曰夫生之資氣清濁異原命之稟數盈虛乖致是以心貌詭貿性運舛

殊故有邪正昏明之差脩天榮枯之序皆理定於萬古
之前事徵於千代之外冲神寂鑒一以貫之至乃卜相
未技巫史賤術猶能豫題興亡逆表成敗禍福指期識
照不能徙吉凶素著威衛不能防若夏氓宅生於帝宮
豈蠲殘傷之崇漢臣衍貨於天府寧免餒斃之魂且又
善惡之理雖詳而禍福之驗常昧逆順之體誠分而吉
凶之效嘗隱智絡天地猶惟沈牖之災明照日月必嬰
申匡之難增信積德離患於長飢席義枕仁徼禍於促

算何則理運苟其必至聖明其猶病諸况乃叢迹流惑
之徒投心顛蒙之域而欲役慮以揣利害策情以竿窮
通其爲重傷豈不惑甚是以通人君子閑泰其神冲緩
其度不矯俗以延聲不依世以期榮審乎無假自求多
福榮辱脩天夫何爲哉問曰夫書稱惠迪貽吉易載履
信逢祐前哲餘議亦以將迎有會淪塞無兆宣攝有方
天闕無命善游消魂於深梁工騎燼生於曠野明珠昭
駭於闇至蠅木取悅於先容是以罕樂以陽施長世景

惠以陰德遐紀彭竇以繕衛延命盈忌以荒酒促齡陳
張稱台鼎之崇嚴辛衍宰相之盛若乃游惡蹈凶處逆
踐禍宣昭史策易以研正至如神仙所序天竺所書事
雖難徵理未易詰留滯傾光思聞通裁對曰子可謂扶
繩而辨循刻而議若乃宣攝有方豈非吉運所屬將迎
有會實亦凶數自挺若夫陽施陰德長世遐年揆厥所
原孰往非命研復來旨讎校往說起予惟商未識所異
資生稟運參差萬殊逆順吉凶理數不一原夫食椒非

養生之術咀劒豈衛性之經命之所延人肉其骨而含
嚼膏粱時或嬰患深澗垂微寵之津空谷絕探榮之轍
運之所集物稊其枯而俯仰竿牘終然離沮爾乃蹻跼
橫行曾原窘步湯周延世詡邑絕緒吉凶徵應糾纏若
茲畢萬保軀密賤璣領梁野之言豈不或妄穀南魯北
甘此促生彭翁竇叟將以何術晉平趙敬淫放已該漢
主魏相奚獨傷天同異若斯是非孰正至如雷濱凝分
挫志遠圖棘津陰拱振功高世樊生冲矯鐫旌善之文

華子高抗銘懲非之策皆士衡所云同川而異歸者也
殊塗均致實繁有徵即理易推在言可略昔兩都全盛
六合殷昌霧集貴寵之間雲動權豪之術鈞賈貽談豈
惟陳張而已觀夫二子才未越衆而此以藉榮揮價彼
獨擯景淪聲通否之運斷可知矣嚴辛不安時任命而
委罪亮直亦地脉之徒歟若神仙所序顯明脩習齊彊
燕平厥驗未著李覃董芬其效安在喬松之侶雲飛天
居夷列之徒風行水息良由理數懸挺實乃鍾茲景命

天竺遺文星華方策因造前定果報指期貧豪莫差脩
天無爽有允瑣辭無愆鄙說統而言之孰往非命冥期
前定各從所歸善惡無所矯其趨愚智焉能殊其理若
乃得議其工失蚩其拙操之則慄舍之則悲斯固染情
於近累豈不貽誚於通識問曰清論光心英辨溢目求
諸鄙懷良有未盡若勤止皆運險易自天理定前期靡
非闇至玉門犂丘叡識弗免豈非聖愚齊致仁虐同功
昏明之用將何施而可對曰夫聖人懷虛以涵育凝明

以洞照惟虛也故無往而不通惟明也故無來而不燭
涸海流金弗染溫涼之岨嚴兵猛兇無累瓜刃之災忘
生而生愈全遺神而神彌暢若玉門犂丘蓋同迹於人
故同人有患然而均心於天亦均天無害大賢則體備
形器慮盡藏假靜默以居否深拱以違礮皆數在清全
故鍾茲妙識是以稟仲尼之道不在奔車之上資伯夷
之運不處覆舟之下若乃越難趨險逡巡弗獲履危踐
機僂俛從事愚之所司聖亦何爲及中下之流馳心妄

動是非舛幹倚伏移貿故北宮意逆而功順東門心晦
而迹明宣應遺筮而逢吉張松協數而遘禍且智防有
紀患累無方爾乃獬狗逐而華子奔腐鼠遺而虞氏滅
匣援逸而林木殘櫝珠亡而池水竭凡厥條流曲難詳
備拙形役思其效安徵豈若澡雪塵府洗練神宅据道
爲心依德爲慮使迹窮則義斯暢身泰則理兼通豈不
美哉何必遺此而取彼問曰夫建極開化樹聲貽則典
防之興由來尚矣必乃幽符懸兆冥數指期善惡前徵

是非素定名教之道不亦幾乎息哉對曰天生蒸民樹之物則教義所稟豈非冥數何則形氣之具必有待而存顯蒙之倫豈無因而立必假纖紉以安生藉梁泰以延祀資信禮以繕性秉廉義以劾情聖人聰明深懿履道測化通體天地同情日月仰觀俯察撫運裁風於是乎昭日星之紀正霜雨之度張雲霞之明衍風露之渥浮舟翼滯騰駕振幽又乃甄理三才辨綜五德弘鋪七體之端宣昭八經之緒是以時雍在運羣方是通抱德

煬和全真保性故信食相資代爲唇齒富教相假遞成
輔車今弛棄纖紃損絕梁蔡必云微生委命豈不已曉
其迷至于湮斥廉義屏黜信禮責以祈存推數遂乃未
辨其惑連類若斯乖妄滋甚然則教義之道生運所資
寵辱榮枯常由此作斯固命中之一物非所以爲難也
問曰循復前旨既以理命縣兆生數冥期研覆後文又
云依仗名教帥循訓範若籍數任天則放情蕩思拘訓
馴範則防慮檢喪函矢殊用矛戈異適雙美之談豈能

兩遂對曰夫性運乖舛心貌詭殊請布末懷略言其要
若乃吉命所鍾縱情蹈道訓性而順因心則靈凶數所
挺率由踐逆聞言不信長惡無悛此愚智不移聲訓所
遺者也其有見善如不及從諫如順流是則命待教全
運須化立譬以良醫之室病者所存至如澄神清魂平
心實氣無妄之病勿藥有喜所謂縱情蹈道無假隱括
若膏肓之疾長桑不治體府之病陽慶弗理此則率由
踐逆自絕調御至乃趙儲之命宜永須扁鵲而後全齊

后之數必延待文摯而後濟亦猶運鍾循獎彞範所興
善惡無主唯運所集而異膏梁方丈沈疾弗顧瑤碧盈
尺貼危弗存夫靜躁之容造次必於是曲直之性顛沛
不可移是以夷惠均聖而異方遵竦齊通而殊事雖復
鈐桎昇皋思服巢許之情挫勒曾史言膺蹻跂之慮不
然之事斷可知也必幽符鑕仰冥數修習雖存陵情其
可得乎故運屬波流勢無防慮命徼山立理無放情用
殊函矢雙美奚躋談異矛戈兩濟何傷問曰夫君臣恩

深師資義固所以霑榮塗施提飾荷聲故剗心流腸捐
生以抗節火妻灰子薶名以償義若幽期天兆則明剔
可遺冥數自賓則感効宜絕豈其然乎對曰論之所明
原本以爲理難之所疑即末以爲用蓋陰閉之巧不傳
萌漸之調長絕故知妄言賞理古人所難吾所謂命固
以綿絡古今彌貫終始爰及君臣父子師友夫妻皆天
數冥合神運玄至逮乎睽愛離會既命之所甄昏爽順
戾亦運之所漸爾乃松柳異質薺荼殊性故疾風知勁

草嚴霜識貞木何異忠孝之質資行風昭至於刻志酬
生題誠復施殉節投命酬義忘已亦由石雖可毀堅不
可銷丹雖可磨赤不可滅因斯而言君臣師資既幽期
自賓心力感効亦冥數天兆夫獨何怪哉

陸子真

薦關康之奏

康之河東揚人學通經釋微辟不就世祖即位遣大使巡行天下使

反薦康之
不見省

康之業履恒貞操勗清固行信閭黨譽延邦邑棲志希

古操不可渝宜加徵聘以潔風軌

孫薩

詣郡列辭

薩彭城人大明五年發三五丁薩應充行坐違期付獄兄棘詣郡乞以身

代薩又辭列免兄棘妻許復語棘君當門戶且大家以小郎屬君豈可妻罪太守張岱依

事表上世祖下詔

門戶不建罪應至此狂愚犯法實是薩身自應依法受戮兄弟少孤薩三歲失父一生恃賴唯在長兄兄雖可垂憐有何心處世

孝武帝詔

棘薩毗隸節行可甄特原罪州加辟命并賜許帛二十

匹

周殷

啓孝武帝

世祖即位改元孝建殷時爲中軍府
錄事參軍上啓俗敝如此竟不能革

今士大夫父母在而兄弟異計十家而七庶人父子殊
產八家而五其甚者乃危亡不相知飢寒不相恤又疾

讒害其間不可稱數宜明其禁以易其風後魏書

袁覲

位武陵內史

臨終與兄顗書

覲子彖字偉才小字史公少有風氣善屬文歷諸王府參軍不就覲臨終與兄顗書

史公才識可喜足慰先基矣南齊書

王元曾

東海人仕別駕


與劉惠書

惠沛郡相人臨賀太守

劉瓛字子珪大明四年舉秀才兄璩亦有名先應州舉元曾與瓛父書

此歲賢子充秀州閭可謂得人

南史



宋文紀卷十四